

許州志

卷之七人物上

7



DS
793
H52H835
1838
V.7

許州志卷之七

直隸許州知州高安蕭元吉纂修

人物上

前哲

儒碩

孝友

汝南先賢陳留耆舊尙矣許人才之盛在兩漢
何減汝南陳留魏晉而降迄於元明魁人傑士
依然輩出土果雅意前修豈無三代以上之人
材爲

昭代光爲閭里式

前哲

西漢鼂錯潁川人也學申韓刑名於軹張恢生所與
雒陽宋孟及劉帶同師以文學爲太常掌故錯爲
人隋直深刻孝文時天下無治尙書者獨聞齊有
伏生故秦博士治尙書年九十餘老不可徵迺詔
太常使人受之太常遣錯受尙書伏生所還因上
書稱說詔以爲太子舍人門大夫遷博士又上書
言人主所以尊顯功名揚於萬世之後者以知術
數也故人主知所以臨制臣下而治其衆則羣臣
畏服矣知所以聽言受事則不欺蔽矣知所以安

利萬民則海內必從矣知所以忠孝事上則臣子之行備矣此四者臣竊以爲皇太子急之人臣之議或曰皇太子亡以知事爲也臣之愚誠以爲不然竊觀上世之君不能奉其宗廟而刼殺於其臣者皆不知術數者也皇太子所讀書多矣而未深知術數者不問書說也夫多誦而不知其說所謂勞苦而不爲功臣竊觀皇太子材智高奇馭射技藝過人絕遠然於術數未有所守者以陛下爲心也竊願陛下幸擇聖人之術可用今世者以賜皇

太子因時使太子陳明於前惟陛下裁察上善之
於是拜錯爲太子家令以其辯得幸太子號曰智
囊是時匈奴彊數寇邊上發兵以禦之錯上言兵
事曰臣聞漢興以來胡虜數入邊地小入則小利
大入則大利高后時再入隴西攻城屠邑毆畧畜
產其後復入隴西殺吏卒大寇盜竊聞戰勝之威
民氣百倍敗兵之卒沒世不復自高后以來隴西
三困於匈奴矣民氣破傷亡有勝意今茲隴西之
吏賴社稷之神靈奉陛下之明詔和輯士卒底厲

其節起破傷之民以當乘勝之匈奴用少擊衆殺
一王敗其衆而大有利非隴西之民有勇怯廼將
吏之制巧拙異也故兵法曰有必勝之將無必勝
之民繇此觀之安邊境立功名在於良將不可不
擇也臣又聞用兵臨戰合刃之急者三一日得地
形二曰卒服習三曰器用利兵法曰丈五之溝漸
車之水山林積石經川邱阜草木所在此步兵之
地也車騎二不當一土山邱陵曼衍相屬平原曠
野此車騎之地也步兵十不當一平陵相遠川谷

居間仰高臨下此弓弩之地也短兵百不當一兩
陳相近平地淺草可前可後此長戟之地也劍楯
三不當一萑葦竹蕭草木蒙龍枝葉茂接此矛鋌
之地也長戟二不當一曲道相伏險阨相薄此劍
楯之地也弓弩三不當一士不選練卒不服習起
居不精動靜不集趨利弗及避難不畢前擊後解
與金鼓之音相失此不習勒卒之過也百不當十
兵不完利與空手同甲不堅密與袒裼同弩不可
以及遠與短兵同射不能中與亡矢同中不能入

與無鏃同此將不省兵之禍也五不當一故兵法
曰器械不利以其卒予敵也卒不可用以其將予
敵也將不知兵以其主予敵也君不擇將以其國
予敵也四者國之至要也臣又聞小大異形彊弱
異勢險易異備夫卑身以事彊小國之形也合小
以攻大敵國之形也以蠻夷攻蠻夷中國之形也
今匈奴地形技藝與中國異上下山阪出入溪澗
中國之馬弗與也險道傾仄且馳且射中國之騎
弗與也風雨罷勞饑渴不困中國之人弗與也此

匈奴之長技也若夫平原易地輕車突騎則匈奴之衆易撓亂也勁弩長戟射疏及遠則匈奴之弓弗能格也堅甲利刃長短相雜遊弩往來什伍俱前則匈奴之兵弗能當也材官騶發矢道同的則匈奴之草筍木薦弗能支也下馬地鬪劍戟相接去就相薄則匈奴之足弗能給也此中國之長技也以此觀之匈奴之長技三中國之長技五陛下又與數十萬之衆以誅數萬之匈奴衆寡之計以一擊十之術也雖然兵凶器也戰危事也以大爲

小以彊爲弱在俯仰之間耳夫以人之死爭勝跌而不振則悔之亡及也帝王之道出於萬全今降胡義渠蠻夷之屬來歸誼者其衆數千飲食長技與匈奴同可賜之堅甲絮衣勁弓利矢益以邊郡之良騎令明將能知其習俗和輯其心者以陛下之明約將之卽有險阻以此當之平地通道則以輕車材官制之兩軍相爲表裏各用其長技衡加之以衆此萬全之術也傳曰狂夫之言而明主擇焉臣錯愚陋昧死上狂言唯陛下財擇文帝嘉之

乃賜錯璽書寵答焉曰皇帝聞太子家令上書言
兵體三章聞之書言狂夫之言而明主擇焉今則
不然言者不狂而擇者不明國之大患故在於此
使夫不明擇於不狂是以萬聽而萬不當也錯復
言守邊備塞勸農力本當世急務二事曰臣聞秦
時北攻胡貉築塞河上南攻楊粵置戍卒焉其起
兵而攻胡粵者非以衛邊地而救民死也貪戾而
欲廣大也故功未立而天下亂且夫兵起而不知
勢戰則爲人禽屯則卒積死夫胡貉之地積陰之

處也木皮三寸冰厚六尺食肉而飲酪其人密理
鳥獸毳毛其性能寒楊粵之地少陰多陽其人疏
理鳥獸希毛其性能暑秦之戍卒不能其水土戍
者死於邊輸者僨於道民見行如往棄市因以謫
發之名曰謫戍先發吏有謫及贅壻賈人後以嘗
有市籍者又後以太父母父母嘗有市籍者後入
間取其左發之不順行者深怨有背畔之心凡民
守戰至死而不降北者以計爲之也故戰勝守固
則有拜爵之賞攻城屠邑則得其財鹵以富家室

故能使其衆蒙矢石赴湯火視死如生今秦之發
卒也有萬死之害而亡銖兩之報死事之後不得
一算之復天下明知禍烈及已也陳涉行戍至於
大澤爲天下先倡天下從之如流水者秦以威劫
而行之之敝也胡人衣食之業不著於地其勢易
以擾亂邊境何以明之胡人食肉飲酪衣皮毛非
有城郭田宅之歸居如飛鳥走獸於曠野美草甘
水則止草盡水竭則移以是觀之往來轉徙時至
時去此胡人之生業而中國之所以離南晦也今

使胡人數處轉牧行獵於塞下或當燕代或當上郡北地隴西以候備塞之卒卒少則入陛下不救則邊民絕望而有降敵之心救之少發則不足多發則遠縣纔至而胡又已去聚而不罷爲費甚大罷之則胡復入如此連年則中國貧苦而民不安矣陛下幸憂邊境遣將吏發卒以治塞甚大惠也然今遠方之卒守塞一歲而更不知胡人之能不如選常居者家室田作且以備之以便爲之高城深塹具蘭石布渠荅復爲一城其內城間百五十

步要害之處通川之道調立城邑毋下千家爲中
周虎落先爲室屋具田器廼募臯人及免徒復作
令居之不足募以丁奴婢贖臯及輸奴婢欲以拜
爵者不足廼募民之欲往者皆賜高爵復其家予
冬夏衣廩食能自給而止郡縣之民得買其爵以
自增至卿其亡夫若妻者縣官買予之人情非有
匹敵不能久安其處塞下之民祿利不厚不可使
久居危難之地胡人入驅而能止其所驅者以其
半予之縣官爲贖其民如是則邑里相救助赴胡

不避死非以德上也欲全親戚而利其財也此與
東方之戎卒不習地勢而心畏胡者功相萬也以
陛下之時徙民實邊使遠方無屯戍之事塞下之
民父子相保無係虜之患利施後世名稱聖明其
與秦之行怨民相去遠矣上從其言募民徙塞下
錯復言陛下幸募民相徙以實塞下使屯戍之事
益省輸將之費益寡甚大惠也下吏誠能稱厚惠
奉明法存卹所徙之老弱善遇其壯士和輯其心
而毋侵刻使先至者安樂而不思故鄉則貧民相

募而勸往矣臣聞古之徙遠方以實廣虛也相其陰陽之和嘗其水泉之味審其土地之宜觀其草木之饒然後營邑立城製里割宅通田作之道正阡陌之界先爲築室家有一堂二內門戶之閉置器物焉民至有所居作有所用此民所以輕去故鄉而勸之新邑也爲置醫巫以救疾病以修祭祀男女有昏生死相卹墳墓相從種樹畜長室屋完安此所以使民樂其處而有長居之心也臣又聞古之制邊縣以備敵也使五家爲伍伍有長十長

一里里有假士四里一連連有假五百十連一邑
邑有假候皆擇其邑之賢材有護習地形知民心
者居則習民於射法出則教民於應敵故卒伍成
於內則軍正定於外服習以成勿令遷徙幼則同
遊長則共事夜戰聲相知則足以相救晝戰目相
覘則足以相識驩愛之心足以相死如此而勸以
厚賞威以重罰則前死不還踵矣所徙之民非壯
有材力但費衣糧不可用也雖有材力不得良吏
猶無功也陛下絕匈奴不與和親臣竊意其冬來

南也壹大治則終身創矣欲立威者始於折膠來而不能困使得氣去後未易服也愚臣無識惟陛下財察後有詔舉賢良文學士錯在選中上親策詔之曰惟十有五年九月壬子皇帝曰昔者大禹勤求賢士施及方外四極之內舟車所至人迹所及靡不聞命以輔其不逮近者獻其明遠者通厥聰比善戮力以翼天子是以大禹能無失德夏以長楸高皇帝親除大害去亂從並建豪英以爲官師爲諫爭輔天子之闕而翼戴漢宗也賴天之靈

宗廟之福方內以安澤及四夷今朕獲執天下之
正以承宗廟之祀朕既不德又不敏明弗能燭而
智弗能治此大夫之所著聞也故詔有司諸侯王
三公九卿及主郡吏各帥其志以選賢良明於國
家之大體通於人事之終始及能直言極諫者各
有人數以匡朕之不逮二三大夫之行當此三道
朕甚嘉之故登大夫於朝親諭朕志大夫其上三
道之要及承惟朕之不德吏之不平政之不宣民
之不寧四者之闕悉陳其志毋有所隱上以薦先

帝之宗廟下以興愚民之休利著之於篇朕親覽
焉觀大夫所以佐朕至與不至書之周之密之重
之閉之興自朕躬大夫其正論毋枉執事烏虓戒
之二三大夫其帥志毋怠錯對曰平陽侯臣窋汝
陰侯臣竈潁陰侯臣何延尉臣宜昌隴西太守臣
昆邪所選賢良太子家令臣錯昧死再拜言臣竊
聞古之賢主莫不求賢以爲輔翼故黃帝得力牧
而爲五帝大禹得咎繇而爲三王祖齊桓得甞子
而爲五伯長今陛下講於大禹及高皇帝之建豪

英也退託於不明以求賢良讓之至也臣竊觀上世之傳若高皇帝之建功業陛下之厚德而得賢佐皆有司之所覽刻於玉版藏於金匱歷之春秋紀之後世爲帝者祖宗與天地相終今臣竄等廼以臣錯充賦甚不稱明詔求賢之意臣錯草茅臣亡識知昧死上愚對曰詔策曰明於國家大體愚臣竊以古之五帝明之臣聞五帝神聖其臣莫能及故自親事處於法宮之中明堂之上動靜上配天下順地中得人故衆生之類亡不覆也根著之

徒亡不載也燭以光明亡偏異也德上及飛鳥下
至水蟲草木諸產皆被其澤然後陰陽調四時節
日月光風雨時膏露降五穀熟妖孽滅賊氣息民
不疾疫河出圖洛出書神龍至鳳鳥翔德澤滿天
下靈光施四海此謂配天地治國大體之功也詔
策曰通於人事終始愚臣竊以古之三王明之臣
聞三王臣主俱賢故合謀相輔計安天下莫不本
於人情人情莫不欲壽三王生之而不傷也人情
莫不欲富三王厚之而不困也人情莫不欲安三

王扶之而不危也人情莫不欲逸三王節其力而不盡也其爲法令也合於人情而後行之其動衆使民也本於人事然後爲之取人以恕人情之所惡不以彊民人情之所欲不以禁民是以天下樂其政歸其德望之若父母從之若流水百姓和親國家安寧名位不失施及後世此明於人情終始之功也詔策曰直言極諫愚臣竊以五伯之臣明之臣聞五伯不及其臣故屬之以國任之以事五伯之佐之爲人臣也察身而不敢誣奉法令不容

私盡心力不敢矜遭患難不避死見賢不居其上
受祿不過其量不以無能居尊顯之位自行若此
可謂方正之士矣其立法也非以苦民傷衆而爲
之機陷也以之興利除害尊主安民而救暴亂也
其行賞也非虛取民財妄予人也以勸天下之忠
孝而明其功也故功多者賞厚功少者賞薄如此
斂民財以顧其功而民不恨者知與而安已也其
行罰也非以忿怒妄誅而從暴心也以禁天下不
忠不孝而害國者也故臯大者罰重臯小者罰輕

如此民雖伏辜至死而不怨者知辜罰之至自取之也立法若此可謂平正之吏矣法之逆者請而更之不以傷民行之暴者逆而復之不以傷國救主之失補主之過揚主之美明主之功使主內無邪僻之行外亡騫污之名事君若此可謂直言極諫之士矣此五伯之所以德匡天下威正諸侯功業甚矣名聲章明舉天下之賢主五伯與焉此身不及其臣而使得直言極諫補其不逮之功也今陛下人民之衆威武之重德惠之厚令行禁止之

勢萬萬於五伯而賜愚臣策曰匡朕之不逮愚臣
何足以識陛下之高明而奉承之詔策曰吏之不
平政之不宜民之不寧愚臣竊以秦事明之臣聞
秦始并天下之時其主不及三王而臣不及其佐
然功力不遲者何也地形便山川利財用足民利
戰其所與並者六國六國者臣主皆不肖謀不輯
民不用故當此之時秦最富彊夫國富彊而隣國
亂者帝王之資也故秦能兼六國立爲天子當此
之時三王之功不能進焉及其末塗之衰也任不

肖而信讒賊宮室過度嗜慾亡極民力罷盡賦斂
不節矜奮自賢羣臣恐諛驕溢縱恣不顧患禍妄
賞以隨喜意妄誅以快怒心法令煩僭刑罰暴酷
輕絕人命身自射殺天下寒心莫安其處姦邪之
吏乘其亂法以成其威獄官主斷生殺自恣上下
瓦解各自爲制秦始亂之時吏之所先侵者貧人
賤民也至其中節所侵者富人吏家也及其末塗
所侵者宗室大臣也是故親疏皆危外內咸怨離
散逋逃人有走心陳勝先倡天下大潰絕祀亡世

爲異姓福此吏不平政不宣民不寧之禍也今陛下配天象地覆露萬民絕秦之迹除其亂法躬親本事廢去淫末除苛解嬈寬大愛人肉刑不用臯人亡帑非謗不治鑄錢者除通關去塞不孽諸侯賓禮長老愛卹少孤臯人有期後宮出嫁尊賜孝悌農民不租明詔軍師愛士大夫求進方正廢退姦邪除去陰刑害民者誅憂勞百姓列侯就都親耕節用視民不奢所爲天下興利除害變法易故以安海內者大功數十皆上世之所難及陛下行

之道純德厚元元之民幸矣詔策曰永惟朕之不
德愚臣不足以當之詔策曰悉陳其志毋有所隱
愚臣竊以五帝之賢臣明之臣聞五帝其臣莫能
及則自親之三王臣主俱賢則共憂之五伯不及
其臣則任使之此所以神明不遺而聖賢不廢也
故各當其世而立功德焉傳曰往者不可及來者
猶可待能明其世者謂之天子此之謂也竊聞戰
不勝者易其地民貧窮者變其業今以陛下神明
德厚資財不下五帝臨制天下至今十有六年民

不益富盜賊不衰邊竟未安其所以然意者陛下
未之躬親而待羣臣也今執事之臣皆天下之選
已然莫能望陛下清光譬之猶五帝之佐也陛下
不自躬親而待不望清光之臣臣竊恐神明之遺
也日損一日歲亡一歲日月益暮盛德不及究於
天下以傳萬世愚臣不自度量竊爲陛下惜之昧
死上狂惑草茅之愚臣言惟陛下下財擇時賈誼已
死對策者百餘人唯錯爲高第繇是遷中大夫錯
又言宜削諸侯事及法令可更定者書凡三十篇

孝文雖不盡聽然奇其材當是時太子善錯計策
爰盎諸大功臣多不好錯景帝卽位以錯爲內史
錯數請間言事輒聽幸傾九卿法令多所更定丞
相申屠嘉心弗便力未有以傷內史府居太上廟
堧中門東出不便錯乃穿門南出鑿廟堧垣丞相
大怒欲因此過爲奏請誅錯錯聞之卽請間爲上
言之丞相奏事因言錯擅鑿廟堧爲門請下廷尉
誅上曰此非廟堧廼堧中垣不致於法丞相謝罷
朝因怒謂長史曰吾當先斬以聞廼先請固誤丞

相遂發病死錯以此愈貴遷爲御史大夫請諸侯之罪過削其支郡奏上上公卿列侯宗室雜議莫敢難獨竇嬰爭之繇此與錯有隙錯所更令三十章諸侯驩譁錯父聞之自潁川來謂錯曰上初卽位公爲政用事侵削諸侯疏人骨肉口讓多怨公何爲也錯曰固也不如此天子不尊宗廟不安父曰劉氏安矣而黽氏危吾去公歸矣遂飲藥死曰吾不忍見禍逮身後十餘日吳楚七國俱反以誅錯爲名上與錯議出軍事錯欲令上自將兵而身

居守會竇嬰言爰盎詔召入見上方與錯調兵食
上問盎曰君嘗爲吳相知吳臣甲祿伯爲人虐今
吳楚反與公意何如對曰不足憂也今破矣上曰
吳王卽山鑄錢煮海爲鹽誘天下豪傑白頭舉事
此其計不百全豈發乎何以言其無能爲也盎對
曰吳銅鹽之利則有之安得豪傑而誘之誠令吳
得豪傑亦且輔而爲誼不反矣吳所誘皆無賴子
弟亡命鑄錢姦人故相誘以亂錯曰盎策之善上
問曰計安出盎對曰願屏左右上屏人獨錯在盎

田臣所言人臣不得知廼屏錯錯趨避東廂甚恨
上卒問盎對曰吳楚相遺書言高皇帝王子弟各
有分地今賊臣黷錯擅適諸侯削奪之地以故反
名爲西共誅錯復故地而罷方今計獨有斬錯發
使赦吳楚七國復其故地則兵可毋血刃而俱罷
於是上默然良久曰顧誠何如吾不愛一人謝天
下盎曰愚計出此惟陛下熟計之廼拜盎爲太常
密裝治行後十餘日丞相青翟中尉嘉廷尉歐劾
奏錯曰吳王反逆亡道欲危宗廟天下所當共誅

今御史大夫錯議曰兵數百萬獨屬羣臣不可信
陛下不如自出臨兵使錯居守徐僮之旁吳所未
下者可以予吳錯不稱陛下德信欲疏羣臣百姓
又欲以城邑予吳亡臣子禮大逆無道錯當要斬
父母妻子同產無少長皆棄市臣請論如法制曰
可錯殊不知乃使中尉召錯給載行市錯衣朝衣
斬東市錯已死謁者僕射鄧公爲校尉擊吳楚爲
將還上書言軍事見上上問曰道軍所來聞鼂錯
死吳楚罷不鄧曰吳爲反數十歲矣發怒削地以

誅錯爲名其意不在錯也且臣恐天下之士拊口
不敢復言矣上曰何哉鄧曰夫鼂錯患諸侯彊大
不可制故請削之以尊京師萬世之利也計畫始
行卒受大戮內杜忠臣之口外爲諸侯報仇臣竊
爲陛下不取也於是景帝喟然長息曰公言善吾
亦恨之廼拜鄧公爲城陽中尉鄧公成固人也多
奇計建元年中上招賢良公卿言鄧先鄧先時免
起家爲九卿一年復謝病免歸其子章以修黃老
言顯諸公間

賈山潁川人也祖父祛故魏王時博士弟子也山受學祛所言涉獵書記不能爲醇儒嘗給事潁陰侯爲騎孝文時言治亂之道借秦爲諭名曰至言其辭曰臣聞爲人臣者盡忠竭愚以直諫主不避死亡之誅者臣山是也臣不敢以久遠諭願借秦以爲諭唯陛下少加意焉夫布衣韋帶之士修身於內成名於外而使後世不絕息至秦則不然貴爲天子富有天下賦斂重數百姓任罷赭衣半道羣盜滿山使天下之人戴目而視傾耳而聽一夫

大譟天下應響者陳勝是也秦非徒如此也起咸陽而西至雍離宮三百鐘鼓帷帳不移而具又爲阿房之殿殿高數十仞東西五里南北千步從軍羅騎四馬驚馳旌旗不撓爲宮室之麗至於此使其後世曾不得聚廬而託處焉爲馳道於天下東窮燕齊南極吳楚江湖之上瀕海之觀畢至道廣五十步三丈而樹厚築其外隱以金樅樹以青松爲馳道之麗至於此使其後世曾不得邪徑而託足焉死塋乎驪山吏徒數十萬人曠日十年下徹

三泉合采金石冶銅錮其內漆塗其外被以珠玉飾以翡翠中成觀游上成山林爲堊葬之侈重於此使其後世曾不得蓬顆蔽塚而託葬焉秦以熊羆之力虎狼之心蠶食諸侯并吞海內而不篤禮義故天殃已加矣臣昧死以聞願陛下少畱意而詳擇其中臣聞忠臣之事君也言切直則不用而身危不切直則不可以明道故切直之言明主所欲急聞忠臣之所以蒙死而竭知也地之磽者雖有善種不能生焉江臯河瀕雖有惡種無不猥大

昔者夏商之季世雖關龍逢箕子比干之賢身死
亡而道不用文王之世豪傑之士皆得竭其智芻
蕘採薪之人皆得盡其力此周之所以興也故地
之美者善養禾君之仁者善養士雷霆之所擊無
不摧折者萬鈞之所壓無不糜滅者今人主之威
非特雷霆也勢重非特萬鈞也開道而求諫和顏
色而受之用其言而顯其身士猶恐懼而不敢自
盡又廼况於縱欲恣行暴虐惡聞其過乎震之以
威壓之以重則雖有堯舜之智孟賁之勇豈有不

摧折者哉如此則人主不得聞其過失矣弗聞則社稷危矣古者聖王之制史在前書過失工誦箴諫瞽誦詩諫公卿比諫士傳言諫過庶人謗於道商旅議於市然後君得聞其過失也聞其過失而改之見義而從之所以永有天下也天子之尊四海之內其義莫不爲臣然而養三老於大學親執醬而餽執爵而醕祝醵在前祝鰾在後公卿奉杖大夫進履舉賢以自輔弼求修正之士使直諫故以天子之尊尊養三老視孝也立輔弼之臣者恐

驕也置直諫之士者恐不得聞其過也學問至於
芻蕘者求善無厭也商人庶人誹謗已而改之從
善無不聽也昔者秦政力并萬國富有天下破六
國以爲郡縣築長城以爲關塞秦地之固大小之
勢輕重之權其與一家之富一夫之強胡可勝計
也然而兵破於陳涉地奪於劉氏者何也秦王貪
狠暴虐殘賊天下窮困萬民以適其欲也昔者周
益千八百國以九州之民養千八百國之君用民
之力歲不過三日什一而藉君有餘財民有餘力

而頌聲作秦皇帝以千八百國之民自養力罷不能勝其役財盡不能勝其求一君之身其所以自養者馳騁弋獵之娛天下弗能供也勞罷者不得休息饑寒者不得衣食亡罪而死刑者無所告訴人與之爲怨家與之爲讐故天下壞也秦皇帝身在之時天下已壞矣而弗自知也秦皇帝東巡狩至會稽琅琊刻石著其功自以爲過堯舜統縣石鑄鐘虞飾土築阿房之宮自以爲萬世有天下也古者聖王作諡三四十世耳雖堯舜禹湯文武累

世廣德以爲子孫基業無過二三十世者也秦皇
帝曰死而以諡法是父子名號有時相襲也以一
至萬則世世不相復也故死而號曰始皇帝其次
曰二世皇帝者欲以一至萬也秦皇帝計其功德
度其後嗣世世無窮然身死纔數月耳天下四面
而攻之宗廟滅絕矣秦皇帝居滅絕之中而不自
知者何也天下莫敢告也其所以莫敢告者何也
亡養老之義亡輔弼之臣亡進諫之士縱恣行誅
退誹謗之人殺直諫之士是以道諛媮合苟容比

其德則賢於堯舜課其功則賢於湯武天下已潰而莫之告也詩曰匪言不能胡此畏忌聽言則對譖言則退此之謂也又曰濟濟多士文王以寧天下未嘗亡士也然而文王獨言以寧者何也文王好仁則仁興得士而敬之則士用用之有禮義故不致其愛敬則不能盡其心不能盡其心則不能盡其力不能盡其力則不能成其功故古之賢君於其臣也尊其爵祿而親之疾則臨視之亡數死則往弔哭之臨其小斂大斂已棺塗而後爲之服

錫衰麻經而三臨其喪未斂不飲酒食肉未葬不舉樂當宗廟之祭而死爲之廢樂故古之君人者於其臣也可謂盡禮矣服法服端容貌正顏色然後見之故臣下莫敢不竭力盡死以報其上功德著於後世而令聞不忘也今陛下思念祖考術追厥功圖所以昭光洪業休德使天下舉賢良方正之士天下皆訢訢焉曰將興堯舜之道三王之功矣天下之士莫不精白以承休德今方正之士皆在朝廷矣又選賢者使爲常侍諸吏與之馳驅射

獵一日再三出臣恐朝廷之解弛百官之墮於事也諸侯聞之又必怠於政矣陛下卽位親自勉以厚天下損食膳不聽樂減外徭衛卒止歲貢省廐馬以賦縣傳去諸苑以賦農夫出帛十萬餘匹以賑貧民禮高年九十者一子不事八十者二算不事賜天下男子爵大臣皆至公卿發御府金賜大臣宗族無不被澤赦罪人憐其亡髮賜之巾憐其衣赭書其背父子兄弟相見也而賜之衣平獄緩刑天下莫不說喜是以元年膏雨降五穀登此天

之所以相陛下也刑輕於它時而犯法者寡衣食
多於前年而盜賊少此天下之所以順陛下也臣
聞山東吏部詔令民雖老羸癰疾扶杖而往聽之
願少須臾毋死思見德化之成也今功業方就名
聞方昭四方鄉風今從豪俊之臣方正之士直與
之日月射獵擊兔伐狐以傷大業絕天下之望臣
竊悼之詩曰靡不有初鮮克有終臣不勝大願願
少褻射獵以夏歲二月定明堂造大學修先王之
道風行俗成萬世之基定然後惟陛下所幸耳古

者大臣不嫌古君子不常見其齊嚴之色肅敬之
容大臣不得與宴游方正修潔之士不得從射獵
使皆務其力以高其節則羣臣莫敢不正身修行
盡心以稱大禮如此則陛下之道尊敬功業施於
四海垂於萬世子孫矣誠不如此則行日壞而榮
日滅矣夫士修之于家而壞之於天子之廷臣竊
愍之陛下與衆臣宴遊與大臣方正朝廷論議夫
游不失樂朝不失禮議不失計軌事之大者也其
後文帝除鑄錢令山復上書諫以爲變先帝法非

是又訟淮南王無大罪宜急令反國又言柴唐子
爲不善足以戒章下詰責對以爲錢者亡用器也
而可以易富貴富貴者人主之操柄也令民爲之
是與人主共操柄不可長也其言多急切善指事
意然終不加罰所以廣諫諍之路也其後復禁鑄
錢云

東漢祭遵字弟孫潁川潁陽人也少好經書家富給
而遵恭儉惡衣服喪母負土起墳嘗爲部吏所侵
給客殺之初縣中以其柔也旣而皆憚焉及光武

破王尋等還過潁陽遵以縣吏數進見光武愛其容儀署爲門下吏從征河北爲軍市令舍中兒犯法遵格殺之光武怒命收遵時主簿陳副諫曰明公常欲衆軍整齊今遵奉法不避是教令所行也光武乃貰之以爲刺姦將軍謂諸將曰當備祭遵吾舍中兒犯法尙殺之必不私諸卿也尋拜爲偏將軍從平河北以功封列侯建武二年春拜征虜將軍定封潁陽侯與驃騎大將軍景丹建義大將軍朱祐漢中將軍王常騎都尉王良臧宮等入箕

關南擊宏農厭新栢華蠻中賊弩中遵口洞出流血衆見遵傷稍引退遵呼叱止之士卒戰皆自倍遂大破之時新城蠻中山賊張滿屯結險隘爲人害詔遵攻之遵絕其糧道滿數挑戰遵堅壁不出而厭新栢華餘賊復與滿合遂攻得霍陽聚遵乃分兵擊破降之明年春張滿饑困城拔生獲之初滿祭祀天地自云當王旣執嘆曰讖文誤我乃斬之夷其妻子遵引兵南擊鄧奉弟終於杜衍破之時涿郡太守張豐執使者舉兵反自稱無上大將

軍與彭寵連兵四年遵與朱祐及建威大將軍耿弇驍騎將軍劉喜俱擊之遵兵先至急攻豐豐功曹孟玄執豐降初豐好方術有道士言豐當爲天子以五綵囊裹石繫豐肘云石中有玉璽豐信之遂反旣執當斬猶曰肘石有玉璽遵爲椎破之豐乃知被詐仰天嘆曰當死無所恨諸將皆引還遵受詔畱屯良鄉拒彭寵因遣護軍傅元襲擊寵將李豪於路大破之斬首千餘級相拒歲餘數挫其鋒黨與多降者及寵死遵進定其地六年春詔遵

與建威大將軍耿弇虎牙大將軍蓋延漢中將軍
王常捕虜將軍馬武驍騎將軍劉歆武威將軍劉
向等從天水伐公孫述師次長安時車駕亦至而
隗囂不欲漢兵上隴辭說解故帝詔諸將議皆曰
可且延囂日月之期益封其將帥以消散之遵曰
囂挾姦久矣今若按甲引時則使其詐謀益深而
蜀警備增固不如遂進帝從之乃遣遵爲前行隗
囂使其將王元拒隴坻遵進擊破之追至新關及
諸將到與囂戰並敗引退下隴乃詔遵軍汧耿弇

軍漆征西大將軍馮異軍栒邑大司馬吳漢等還屯長安自是後遵數挫隗囂事已見馮異傳八年秋復從車駕上隴及囂破帝東歸過泝幸遵營勞饗士卒作黃門武樂良夜乃罷時遵有疾詔賜重茵覆以御蓋復令進屯隴下及公孫述遣兵救囂吳漢耿弇等悉奔還遵獨留不卻九年春卒於軍遵爲人廉約小心克己奉公賞賜輒盡與士卒家無私財身衣緯絳布被夫人裳不加緣帝以是重焉及卒愍悼之尤甚遵喪至河南縣詔遣百官先

會喪所車駕素服臨之望哭哀慟還幸城門過其車騎涕泣不能已喪禮成後親祠以太牢如宣帝臨霍光故事詔大長秋謁者河南尹護喪事大司農給費博士范升上疏追稱遵曰臣聞先王崇政遵美屏惡昔高祖大聖深見遠慮班爵割地與下分功著錄勲臣頌其德美生則寵以殊禮奏事不名入門不趨死則疇其爵邑世無絕嗣丹書鐵券傳於無窮斯誠大漢厚下安人長久之德所以累傳十餘歷載數百廢而復興絕而復續者也陛下

以至德受命先明漢道褒序輔佐封賞功臣同符
祖宗征虜將軍潁陽侯遵不幸早薨陛下仁恩爲
之感傷遠迎河南惻怛之慟形於聖躬喪事用度
仰給縣官重賜妻子不可勝數送死有以加生厚
亡有以過存矯俗厲化卓如日月古者臣疾君視
臣卒君弔德之厚者也陵遲已來久矣及至陛下
復興斯禮羣下感動莫不自勵臣竊見遵修行積
善竭忠於國北平漁陽西拒隴蜀先登坻上深取
略陽衆兵旣退獨守衝難制御士心不越法度所

在吏人不知有軍清名聞於海內廉白著於當世
所得賞賜輒盡與吏士身無奇衣家無私財同產
兄弟以遵無子取妾送之遵乃使人送而不受自
以身任於國不敢圖生慮繼嗣之計臨死遺誠牛
車載喪薄塋洛陽閭以家事終無所言任重道遠
死而後已遵爲將軍取士皆用儒術對酒設樂必
雅歌投壺又建爲孔子立後奏置爲五經大夫雖
在軍旅不忘俎豆可爲好禮悅樂守死善道者也
禮生有爵死有謚爵以殊尊卑謚以明善惡臣愚

以爲宜因遵薨論叙衆功詳按諡法以禮成之顯
彰國家讀古之制爲後嗣法帝乃下升章以示公
卿至葬車駕復臨贈以將軍侯印綬朱輪容車介
士軍陣送葬諡曰成侯旣葬車駕復臨其墳存見
夫人室家其後會朝帝每嘆曰安得憂國奉公之
臣如祭征虜者乎遵之見思若此無子國除兄午
官至酒泉太守

祭彤字次孫遵之弟早孤以至孝稱光武時拜黃
門侍郎出爲偃師長有權畧視事五歲縣無盜賊

課爲第一累遷遼東太守三十年衣無兼副顯宗
嘉其清約賜錢百萬徵爲太僕及卒遼東吏人爲
立祠祀之

三國魏胡昭字孔明潁川人養志不仕避地冀州辭
袁紹之命遁還鄉里曹操頻加禮辟昭往應命曰
臣一介野生無軍國之用懇誠求去操曰人各有
志出處異趣勉卒雅尙義不相屈昭乃轉居陸渾
山中躬耕樂道以經籍自娛閭里敬而愛之能籀
書真行草篆皆妙與鍾繇同出劉德昇之門

陳泰字元伯羣之子也正始中爲并州刺史使持
節護北域中郎將懷柔遠民甚有威惠京邑貴人
多寄寶貨因泰示其僕泰皆挂之於壁不發其封
及徵爲尙書悉以還之吳大將孫峻出淮泗以泰
爲鎮軍將軍峻退還轉左僕射諸葛誕作亂壽春
泰署行臺司馬昭文王與泰親友及沛國武陔亦
與泰善昭問陔曰元伯何如其父司空也陔曰通
雅博暢能以天下爲已任者不如也明練簡至立
功立事過之薨諡穆侯子恂嗣

晉荀顗字景倩潁川人魏太尉或之第六子也幼爲姊壻陳羣所賞性至孝總角知名博學洽聞理思周密魏時以父勲除中郎宣帝輔政見顗奇之曰荀令君之子也擢拜散騎侍郎累遷侍中爲魏少帝執經拜騎都尉賜爵關內侯難鍾會易無互體又與扶風王駿論仁孝孰先見稱於世時曹爽專權何晏等欲害太常傅嘏顗營救得免及高貴鄉公立顗言於景帝曰今上踐祚權道非常宜速遣使宣德四方且察外志母邱儉文欽果不服舉兵

反顓預討儉等有功進爵萬歲亭侯邑四百戶文帝輔政遷尙書帝征諸葛誕畱顓鎮守顓甥陳泰卒顓代泰爲僕射領吏部四辭而後就職顓承泰後加之淑慎綜核名實風俗澄正咸熙中遷司空進爵鄉侯顓年踰耳順孝養蒸蒸以母憂去職毀幾滅性海內稱之文帝奏宜依漢太傅胡廣喪母故事給司空吉凶導從及蜀平興復五等命顓定禮儀顓上請牟祐任愷庾峻應貞孔顓共刪改舊文撰文晉禮咸熙初封臨淮侯武帝踐祚進爵爲

公食邑一千八百戶又詔曰昔禹命九官契敷五教所以宏崇王化示人軌儀也朕承洪業昧於大道思訓五品以康四海侍中司空顓明允篤誠思心通遠翼亮先皇遂輔朕躬實有佐命弼導之勲宜掌教典以隆時雍其以顓爲司徒尋加侍中遷太尉都督城外牙門諸軍事置司馬親兵百人頃之又詔曰侍中太尉顓溫恭忠允志行純備博古洽聞耆艾不殆其以公行太子太傅侍中太尉如故時以正德大叙雅頌未合命顓定樂事未終以

泰始十年薨帝爲舉哀皇太子臨喪二宮賻贈禮
秩有加詔曰侍中太尉行太子太傅臨淮公顗清
純體道忠允立朝歷司內外茂績旣崇訓傳東宮
徽猷宏著可謂行歸於周有始有卒者矣不幸薨
逝朕甚痛之其賜溫明秘器朝服一具衣一襲諡
曰康

荀崧字景猷或之元孫志操清純雅好文學初襲
父爵補濮陽侯後以修復山陵功進爵爲曲陵公
元帝初徵拜尙書僕射朝廷以臨淮公顗嗣絕詔

令崧子襲封崧哀從弟馯之子序孤徵乃讓封論者稱焉累遷開封儀同三司錄尚書事卒贈侍中諡曰敬

荀邃字道元解音樂善談論弱冠辟趙王倫相國掾太子洗馬長沙王乂以爲參軍乂敗成都王爲皇太弟精選僚屬以邃爲中書舍人鄴城不守隨藩在密元帝詔爲丞相從事中郎以道險不就愍帝就加左將軍陳畱相父憂去職服闋襲封愍帝欲納邃女先徵爲散騎常侍邃懼西都危逼故不

應命而東渡江元帝以爲軍諮祭酒太興初拜侍
中邃與刁協婚親時協執權欲以邃爲吏部尙書
邃深拒之尋而王敦討協協黨與並及於難唯邃
以疎協獲免敦表爲廷尉以疾不拜遷太常轉尙
書蘇峻作亂邃與王導荀崧並侍太子於石頭峻
平後卒贈金紫光祿大夫諡曰靖子汪嗣

鍾雅字彥胄潁川長社人也父畢公府掾早終雅
少孤好學有才志舉四行除汝陽令入爲佐著作
郎母憂去官服闋復職東海王越請爲參軍遷尙

書郎避亂東渡元帝以爲丞相記室參軍遷臨淮
內史振威將軍頃之徵拜散騎侍郎轉尙書右丞
時有事於太廟雅奏曰陛下繼承世數於京兆府
君爲元孫而今祝文稱曾孫恐此因循之失宜見
改正又禮祖之昆弟從祖父也景皇帝自以功德
爲世宗不以伯祖而登廟亦宜除伯祖之文詔曰
禮事宗廟自曾孫以下皆稱曾孫此非因循之失
也義取於重孫可歷世共其名無所改也稱伯祖
不安如所奏轉北軍中侯大將軍王敦請爲從事

中郎補宣城內史錢鳳作逆加廣武將軍率眾屯
青戈時廣德縣人周圮爲鳳平徵拜尙書左丞明
帝崩遷御史中丞時國喪未期而尙書梅陶私爲
女妓雅劾奏曰臣聞放勛之殂八音遏密雖在凡
庶猶能三載自茲以來歷代所同肅祖明皇帝崩
背萬國當期月來聖主縞素泣血臨朝百僚悽愴
動無歡容陶無大臣忠慕之節家庭侈靡聲妓紛
葩絲竹之音流聞衢路宜加放黜以整王憲請下
司徒論正請議穆后臨朝特原不問雅直法繩違

百僚皆憚之北中郎將劉遐卒遐部曲作亂詔郭
默討之以雅監征討軍事假節事平拜驍騎將軍
蘇峻之難詔雅爲前鋒監軍假節事領騎勇千人
以距峻雅以兵少不敢擊退還拜侍中尋王師敗
績雅與劉超並侍衛天子或謂雅曰見可而進知
難而退古之道也君性亮直必不容於寇讎何不
隨時之宜而坐待其斃雅曰國亂不能匡君危不
能濟各遜遁以求免吾懼董狐執簡而至矣庾亮
臨去顧謂雅曰後事深以相委雅曰棟折榱崩誰

之責也亮曰今日之事不容復言卿當期剋復之
效耳雅曰想足下不愧荀林父耳及峻逼遷車駕
幸石頭雅乃流涕步從明年並爲賊所害賊平追
贈光祿勳其後以家貧詔贈布帛百疋子誕位至
中軍參軍早卒

荀綦字令遠崧之子起家秘書郎稍遷尙書左丞
綦有儀操風望爲簡文帝雅重時桓溫平蜀帝欲
封以豫章郡綦奏曰若溫北平河洛修復園陵將
何以加之帝乃止累官建威將軍吳國內史卒子

籍嗣位至散騎常侍

韓伯字康伯潁川長社人也母殷氏高明有行家
貧窶伯年數歲至大寒母方爲作襦令伯捉熨斗
而謂之曰且著襦尋當作複袴伯曰不復須母問
其故對曰火在斗中而柄尙熱今旣著襦下亦當
煖母甚異之及長清和有思理畱心文藝舅殷浩
稱之曰康伯能自標置居然是出羣之器潁川庾
龢名重一時少所推服常稱伯及王坦之曰思理
倫和我敬韓康伯志力强正吾愧王文度自此以

還吾皆及之矣舉秀才徵佐著作郎並不就簡文
帝居藩引爲談客自司徒左西屬轉撫軍掾中書
郎散騎常侍豫章太守入爲侍中陳郡周勰爲謝
安主簿居喪廢禮時崇尙莊老脫落名教伯領中
正不通勰議曰拜下之敬猶違衆從禮情理之極
不宜以多比爲通時人憚焉識者謂伯可謂澄世
所不能澄而裁世所不能裁者矣與夫容已順衆
者豈得同時而共稱哉王坦之又嘗著公謙論袁
宏作論以難之伯覽而笑其辭旨以爲是非旣辯

誰與正之遂作辯謙以折中之轉丹陽尹吏部尙書領將軍將軍旣病占候者云不宜此官朝廷改授太常未拜卒時年四十九歲贈太常子琯官至衡陽太守

荀羨字令則崧之子年十五將尙潯陽公主羨不欲婚帝室因遁去爲監司追不獲已乃出尙主拜都尉永和中累遷兗州刺史尋以討慕容蘭功將封之羨固辭不受卒贈驃騎將軍

荀組字大章弱冠大尉王衍見而稱之曰彞雅有

才識初爲司徒左西屬補太子舍人司徒王渾請爲從事中郎轉左長史歷太子中庶子滎陽太守趙王倫爲相國欲收大名選海內德望之士以江夏李重及組爲左右長史東平王堪沛國劉謨爲左右司馬倫篡以組爲侍中及長沙王乂敗惠帝遣組及散騎常侍閭邱冲詣成都王穎慰勞其軍帝西幸長安以組爲河南尹遷尙書轉衛尉賜爵成都縣男加散騎常侍中書監轉司隸校尉加特進光祿大夫常侍如故於時天下已亂組兄弟貴

盛懼不容於世雖大官並諷議而已永嘉末復以組爲侍中領太子太保未拜會劉曜王彌逼洛陽組與藩俱出奔懷帝蒙塵司空王浚以組爲司隸校尉組與藩移檄天下以琅邪王爲盟主愍帝稱皇太子組卽太子之舅又領司隸校尉行豫州刺史事與藩并保滎陽之開封建興初詔藩行留臺事俄而藩薨帝更以組爲司空領尙書左僕射又兼司隸復行留臺事州征郡守皆承制行焉進封臨潁縣公加夫人世子印綬明年進位太尉領豫

州牧假節元帝承制以組爲都督司州諸軍加散騎常侍餘如故頃之又除尙書令表讓不拜及西都不守組乃遣使移檄天下共勸進帝欲以組爲司徒以問太常賀循循曰組舊望清重忠勤顯著遷訓五品實允衆望於是拜組爲司徒組逼於石勒不能自立大興初自許昌率其屬數百人渡江給千兵百騎組先所領仍皆統攝頃之詔組與太保西陽王羨並錄尙書事各加班劍六十人永昌初遷太尉領太子太保未拜薨年六十五諡曰元

子奕嗣

奕字元欣少拜太子舍人駙馬都尉侍講東宮出
爲鎮東參軍行揚武將軍新汲令愍帝爲皇太子
召爲中舍人尋拜散騎侍郎皆不就隨父渡江元
帝踐祚拜中庶子遷給事黃門郎父憂去職服闋
補散騎常侍侍中時將繕宮城尙書符下陳畱王
使出城夫奕駁曰昔虞賓在位書稱其美詩詠有
客載在雅頌今陳畱王位在三公之上坐在太子
之右故答表曰書賜物曰與此古今之所崇體國

之高義也謂宜除夫役時尙書張闔僕射孔愉難
奕以爲昔宋不城周春秋所譏特蠲非體宜應減
夫奕重駁以爲春秋之末文武之道將墜於地新
有子朝之亂于時諸侯逋替莫肯率職宋之於周
實有列國之權且同已勤王而主之者晉客而辭
役責之可也今之陳畱無列國之勢此之作否何
益有無臣以爲宜除於國職爲全詔從之時又通
議元會曰帝應敬司徒王導下博士郭熙杜援等
以爲禮無拜臣之文謂宜除敬侍中馮懷議曰天

子修禮莫盛於辟雍當爾之日猶拜三老況今先
帝師傅謂宜盡敬事下門下奕議曰三朝之首宜
明君臣之體則不應敬若他日小會自可盡禮又
至尊與公書手詔則曰頓首言中書爲詔則云敬
問散騎優冊則曰制命今詔文尙異況大會之與
小會理豈得同詔從之

南北朝荀伯子潁陰人羨之孫少好學博覽經傳仕
晉爲著作郎與徐廣同修國史入宋累遷御史中
丞立朝正色衆咸憚之官至東陽太守有文集傳

於世子赤松尚書右丞

齊鍾嶸字仲偉潁川長社人晉侍中雅七世孫父蹈
齊中軍參軍嶸與兄岍弟嶼並好學有思理嶸齊
永明中爲國子生建武初爲南康王侍郎時齊明
帝躬親細務嶸上書諫上謂顧嵩曰鍾嶸何人欲
斷朕幾務答曰嶸雖位末名卑而所言或有可採
上不顧而他言遷晉安王記室

荀濟字子通其先潁川人世居江左濟初與梁武
帝布衣交知梁武當王然負氣不服謂人曰會盾

上摩墨作檄文或稱其才於梁武梁武曰此人好
亂者也濟又上書譏佛法言營費太甚梁武將誅
之濟遂奔魏

宋何中立字公南許州長社人幼警邁與狄遵度遊
遵度曰美才也其父棐遂以女妻之進士及第授
大理評事歷僉書鎮安武勝二鎮節度判官遷殿
中丞召試學士院爲集賢校理改太常博士修起
居注遷祠部員外郎知制誥權發遣開封府事初
有盜慈孝寺章獻皇太后神御服器者旣就繫李

絢以屬吏考掠不得其情輒釋去中立旣至復執以來中立曰此真盜也窮治之卒服罪遷兵部員外郎糾察在京刑獄除龍圖閣直學士知秦州言者以爲非治邊才改慶州奏曰臣不堪於秦則不堪於慶矣願守汝不報戍卒有告大校受贓者中立曰是必挾他怨也鞭卒竄之或曰貸姦可乎中立曰部曲得持短長以制其上則人不自安矣還判太常寺遷刑部郎中進樞密直學士知許州改陳州訛言大水至居人皆恐中立捕誅之又徙杭

州暴中風卒中立頗以文詞自喜然嗜酒無行慶
歷中集賢校理蘇舜欽監進奏院爲褻神會預者
皆一時知名士中立已在召中已而辭不往後舜
欽等得罪中立有力焉

崔立字本仁許州長葛人也祖周度仕周爲兗州
節度判官方慕容彥超反周度責以太義爲其所
殺立舉進士爲果州團練推官有軍卒三人雇舟
載官物而斂衆州將重致之法立察其情以爲臯
止杖奏聞代還知臨清縣徙安豐境有期塘下漑

民田數千頃間因大水塘壞立帥工徒全築之其
後遂不復決嘗知江陰軍開黃河六十以通舟楫
人以爲便又知兗州歲大歉募人出穀數十萬石
以賑救之故境內無有流民積官至給事中知濠
州以工部侍郎致仕卒年七十五立淳謹善論事
方朝廷講禮文之事士大夫爭獻贊頌立獨言水
發徐兗旱連江淮無爲有烈風金陵有大火是天
所以戒驕矜也而中外多士上雲露草木禽蟲諸
物之常瑞此何足爲治道言哉願詔史官勿復紀

錄立事真宗仁宗前後凡上四十餘事多見施用
云

金張穀字伯英臨潁人大定末進士調寧陵縣主簿
尋改同州觀察判官時出兵備邊州徵箭十萬限
以鵬鴈羽爲之其價翔躍穀曰矢去物也何羽不
可節度使曰當須省報穀曰如民急何萬一有責
身任其咎一日之間減價數倍尙書省竟如所請
累遷河東南路轉運使

李元英臨潁人登太和進士第爲郟縣主簿下車

首謁文廟以祭器不堪羞薦撤而更造如式講堂
齋舍重加修葺士林咸傳頌焉

明王家棟許州人髫年負奇稱下筆輒作驚人語萬
歷戊子舉於鄉任山西沁源令勸民農桑助士婚
葬開墾荒地撫字流民一切興利除弊政績見邑
乘中丁父艱闋補山東文登令惠政如沁源念母
老不便迎養解組歸文登人尸祝焉歸田十餘年
杜扉養重足跡不履公庭每拖遊山之屐子鼎臣
登賢書咸謂清白吏報云

芮翀字子翔鄆城人洪武甲戌進士授崑山令仕
至監察御史有胆識敢任事兩奉詔逮訊兩詔馳
驛還治崑十八年奏免包荒錢糧十八萬餘開濬
吳松淤塞二十餘里解遣駢首幽滯者數十百人
至物色人才拔陳皞於庭吏識吳凱於儒童賓夏
景於稚歲尤著郭有道司馬德操之鑑焉
徐固字邦寧號九巖鄆城舉人性剛明任長子令
臨治霆擊霜摧強宗大族不寒而慄民有訴其兄
爲人殺於田間者固察其色曰殺兄者必弟也爾

姑歸吾爲緝之其弟歸遽自殺人驚以爲神其生
平明察大率類此

姚繼可襄城進士仕至宮保尙書初任南陵多異
政巡宣大時俺酋擁兵至塞乞封爵貢市公疏不
宜與和惟修內治外侮自禦云拂當軸意公乃當
軸門生也故時有不顧公門桃李好祇圖天室幅
幘安之謠官至大司空乞休賜傳歸里於親族鄉
黨讓產置田賑荒救困易襄土城以磚新學宮建
尊經閣置書百卷牖掖後學遊宦四十餘年沈潛

性理著六經詮旨理學鵠賀蘭集行世

儒碩

東漢許慎字叔重召陵人性惇篤少博學經籍馬融
常推敬之時人語曰五經無雙許叔重仕爲郡功
曹舉孝廉再遷除浚長卒於家初慎以五經傳說
臧否不同乃撰五經異義又作說文解字三十卷
皆傳於世采入四庫

唐陳貞節潁川人開元初爲右拾遺初隱章懷懿德
節愍四太子並建陵廟分八署置官列吏卒四時

祠官進饗貞節以爲非是上請罷卒吏詔祠官無
領屬以應禮典詔有司博議駕部員外郎裴子餘
曰四太子皆先帝冢賜列聖念懿屬而爲之享誰
不曰然太常博士段同曰隱於上伯祖也服總章
懷伯父也服期懿德節愍堂昆弟也服大功親未
盡廟不可廢禮部尙書鄭惟忠等二十七人亦附
其言於是四陵廟惟減吏卒半它如舊遷太常博
士泣宗奉昭成皇后祔睿宗室又欲肅明皇后并
升焉貞節奏曰廟必有配一帝一后禮之正也昭

成皇后有太妣之德宜升配睿宗肅明皇后旣非
子貴宜在別廟於是留主儀坤廟詔隸太廟毋置
官屬貞節又與博士蘇獻上言睿宗於孝和弟也
兄弟共世昭穆同位則毀二廟天子不得全事七
世矣請以中宗爲別廟大祫則合食太祖奉睿宗
繼高宗則祿獻永序詔可五年太廟壞天子舍主
太極殿營新廟素服避正寢三日不朝猶幸東都
伊闕男子孫平子上書曰此躋二帝之驗也魯文
公之二年躋僖於閔上後太室壞春秋書其災陞

下未祭孝和先祭太上皇先臣後君昔躋兄弟上
今弟先兄祭昔太室壞今太廟毀與春秋正同不
可不察武后篡國孝和中興有功今內主別祠不
得列於世亦已簿矣臣謂宜遷孝和入帝廟帝異
其言詔有司復議貞節獻與博士馮宗質之曰天
子七廟三昭三穆與大祖七父昭子穆兄弟不與
焉睿宗不父孝和必上繼高宗者偶室於廟則爲
二穆於禮可乎禮所不可而使天子旁紹伯考棄
已親正統哉孝和中興別建園寢百世不毀尙何

議哉帝語宰相召平子與博士詳論博士護前言
合軋平子平子援經辨數分明獻等不能屈蘇頌
右博士故平子坐貶都城尉然諸儒以平子孤挺
見迂於禮官不平帝亦知其直久不決然卒不復
中宗於廟明年帝將大享明堂貞節惡武后所營
非古制乃與馮宗上言明堂太微上帝之所武后
始以乾元正寢占陽午地先帝所以聽政故毀殿
作堂撤之日有音如雷庶民譁訕以爲神靈不悅
堂成災火隨之願以明堂復爲乾元殿使人識其

舊不亦愈乎詔所司詳議刑部尙書王志愔等僉
謂明堂壞怪不法天燼之餘不容大享請因舊制
還署乾元正寢正值天子御以朝會著大享復寓
園邱制曰可貞節以壽卒

宋靳裁之許昌人嘗聞西洛程先生之學胡安國入
太學以裁之爲師由是學問益彊識致日明裁之
嘗言士之品大概有三志於道德者功名不足以
累其心志於功名者富貴不足以累其心志於富
貴而已者則亦無所不至矣安國子寅聞其言而

引之曰志於富貴則孔子所謂鄙夫也朱子註論語亦嘗取之

掌禹錫字唐卿鄆城人舉進士爲道州司理參軍試身言書判第一改大理守丞累遷太子賓客以尙書工部侍郎致仕卒禹錫博學多記嘗預修皇祐方域國志地里新書及校正類編神農本草又著郡國手鑒周易集解

元趙居信字季明許州人號東溪先生潁悟過人日記萬言不拘今古官至翰林大學士追封梁國公

諡文簡平生著述有經說史評譙談家訓蜀漢本
未理學正宗禮經荏制追遠錄四道辨等書

明姚德溥字雅修號澤寰登萬歷己酉鄉試幼穎悟
博及羣書學有心得教授生徒從遊者不下百餘
人一時名儒志理學者率歸焉丙辰授固始教諭
日嚴講課引經析疑斷以程朱人以比之月川先
生云

李繼業襄城人自幼器度不凡入小學時勵志勤
苦弱冠食餼於庠讀薛文清公讀書錄遂奮志爲

聖賢之學承先人志修葺紫陽書院讀書其中以
程朱許薛五子書訓迪後進期於躬行實踐嘉靖
乙卯登賢書仕束鹿令勸農興學有賢聲致政歸
卽移居西南山中復興紫雲書院課授生徒四方
來學負笈者衆皆稱爲肖雲先生

孝友

周潁考叔襄城人爲鄭潁谷封人初鄭伯寘姜氏於
城潁而誓之曰不及黃泉無相見也旣而悔之潁
考叔聞之有獻於公公賜之食食舍肉公問之對

曰小人有母皆嘗小人之食矣未嘗君之美請以
遺之公曰爾有母遺繫我獨無賴考叔曰敢問何
謂也公語之故且告之悔對曰君何患焉若闕地
及泉隧而相見其誰曰不然公從之公入而賦大
隧之中其樂也融融姜出而賦大隧之外其樂也
洩洩遂爲母子如初君子曰賴考叔純孝也愛其
母施及莊公詩曰孝子不匱永錫爾類其此之謂
乎

東漢蔡順事母至孝新莽時羣盜並起有赤眉賊樊

崇流聚熊耳山旁剝至許見順拾樵黑白異筐問之順曰黑者奉母白者自食賊大慚遂以肩豚壘酒享順掬澗水滌眉而去境賴以安今名其里曰樵澗建祠祀順祠左尙有細流潺湲云

李曇潁川人少孤事繼母至孝陳蕃等薦之曰曇德行純備擢登三事必能贊美宣聖增光日月桓帝以安車元纁徵之不起

陳紀字元方實長子亦以至德稱兄弟孝養閨門雍和民皆慕之遭黨錮發憤著書數萬言號曰陳

子黨禁解四府並命無所屈就父沒紀每哀至輒
嘔血氣絕雖服除而積毀消瘠殆將滅性豫州刺
史上其事尙書圖像百城以勵風俗董卓入洛陽
乃使就家拜五官中郎將不得已到京師遷侍中
出爲平原相建安初累拜大鴻臚卒於官子羣爲
魏司空

徐庶字元直潁川人也與諸葛孔明友善蜀先主
屯新野庶往見之謂曰諸葛孔明者卧龍也將軍
豈願見之乎先主曰君與俱來庶曰此人可就見

不可屈致也將軍宜枉駕顧先主從之庶從先主
南行爲曹操所追獲其母庶辭先主而指其心曰
本欲與將軍共圖王霸之業者以此方寸地也今
已失老母方寸亂矣無益於事請從此辭遂詣曹
操終身不畫一策

南齊荀匠字文師潁陰人也晉太保勗九世孫祖瓊
年十五復父仇於成都市以孝聞宋元嘉末渡淮
赴武陵王義爲元凶追兵所殺贈員外散騎侍郎
父法超齊中興末爲安復令卒於官凶問至匠號

痛氣絕身體皆冷至夜乃蘇旣而奔喪每宿江渚
商旅皆不忍聞其哭聲服未闋兄斐起家爲鬱林
太守征俚賊爲流矢所中死於陣喪還匠迎於豫
章望舟投水傍人赴救僅得全旣至家貧不得時
葬居父憂并兄服歷四年不出廬戶自括髮後不
復櫛沐髮皆禿落號時聲盡則繼之以泣目眦皆
爛形體枯槁皮骨裁連雖家人不復識郡縣以狀
言高祖詔遣中書舍人爲其除服擢爲豫章王國
左常侍匠雖卽吉毀頓愈甚外祖孫謙戒之曰主

上以孝治天下汝行過古人故發明詔擢汝此職
非惟君父之命難拒固亦揚名後世所顯豈獨汝
身哉匠於是乃拜竟以哀毀卒於家年二十一

唐王博武許州人會昌中侍母至廣州及沙湍口暴
風母溺死博武號泣赴水救之亦死嶺南節度使
盧貞俛吏沈畧訪獲二尸塋之表其墓曰孝子塚
李頤道許州人以孝聞詔旌其門仍命州縣存問
復其賦稅

朱忤繁昌人孝友被旌

王丕繁昌人數世同居被旌

元丁文忠鄆城人業鼓冶母和氏疾與弟文孝竭力
調侍母卒文忠廬墓三年不與妻面父貴又疾醫
不能療文忠造車一輛兄弟共御載父禱於嵩山
五臺泰安河濱諸祠途遇異僧遺藥而愈延祐七
年旌之

陳榮祖鄆城人性孝元季避亂與父母失洪武初
榮祖還父母俱歿號慟幾絕塑像祠之時稱爲陳
丁蘭云

張二郢城人少孤獨與母居元末母子離散後相見於偃師同徙釣州母病思魚羹二忽夢神告曰可於漚麻坑中求之旦往果得魚又母誕日貧無以爲壽晨出見兩狼負一獐置門前鄉里驚異焉母歿二以哀毀卒其妻劉廬墓嘗夜有虎至劉叱之輒去時人並以孝稱之

明何清許州人由監生任環縣訓導初清幼孤事母尹甚孝比授官以母老欲無行母曰汝第往無我顧也居二年母喪清聞訃亟歸至則子銑已舉塋

清悔恨無及徑往塋所結廬卧起三年時有蜂營
窠廬中附人不螫人稱孝感焉成化間旌表

丁一傑許州歲貢任竹谿教諭三歲喪父自幼事
母惟謹食餼於庠督學屢獎其孝及筮仕捧檄色
喜或問之曰吾母以節旌於朝吾復以祿養吾母
幸也迨母故號泣目眇皆爛塋畢廬墓三年時大
祲有盜誤入其室尋慚謝而去神宗時旌表
羅貴長葛人由舉人任蒙陰教諭在任聞母喪號
慟幾絕卽舍妻子徒跣先歸塋之盡誠廬墓三年

有馴蛇鳴雀之異鄉人以爲孝感所致成化間奉
詔旌表

楊瑤長葛人曲盡子道可方曾閔值母病親嘗湯
藥不離卧起者四十餘晝夜無倦容且樂善好施
祠宇橋梁修葺無算時至大荒施衣賑粥郡人賴
以存活者甚衆有司申請於上優獎爲孝善云

趙景鸞臨潁人幼遇母疾憂戚如成人母不食景
鸞亦不食鄉人以小孝子稱之及長事父動息起
居無不以身先之舉宏治壬子鄉試旣上選待次

於家適父得癱疾晝侍左右夜卽卧於榻前以身爲父手足耳目者五年比卒哭泣不欲生衰服不去體有間則讀喪禮世所尙浮屠道家之說一不以自染其醇正篤孝如此

黃上色本州人自幼有孝行十五歲母陳氏抱病上色默祝神明願減已之壽以增母之壽愈母之疾焉後果有驗且形諸夢許人異其事而鳴於官院臺督學俱以匾額獎之

蔚聰襄城人塋父廬墓朝夕悲號傳有鹿燕馴庵

中不去雪夜虎至自遁之異人以為孝感所致

夏質襄城庠生父母故廬墓三年

傅瑤襄城庠生事母陳氏孝母歿廬墓三年不返
妻子疾篤親戚勸之不應時天雹左右田苗牛馬
被傷其境內獨無賊至庄盜去菉豆次夜送還曰
孝子之物不可用此皆孝感所致云

高祥臨潁人事母素孝母病剗股肉以進病遂愈
母死廬墓三年手植松柏築土為墳終其身未嘗

見齒

銀墳臨潁人三歲失母繼母陳氏養育殊至墳事繼母極盡其誠友愛其弟弟嘗被訊法當榜墳泣陳繼母恩仆以代之知縣劉本淳感痛失聲左右皆泣下

張騰臨潁人事母篤孝終始弗懈母卒哀毀踰禮及葬常泣墓側如初喪凡新果蔬不薦不以嘗終身未嘗變焉

陳大化臨潁生員事親無逆克承先志母疾衣不解帶不入私室者累月母故哀毀三日不食成疾

卒

李度臨潁人性至孝事親以誠友愛無間有田二十餘頃盡以讓之二弟年七十餘天啟七年知縣李建和表其門曰耆德榮壽

趙承恩臨潁人事親以孝聞友愛諸弟父卒以所遺產讓之繼事伯母王氏撫二孤若同胞焉

陳則實臨潁人幼純謹篤孝崇禎十四年四月十七日流寇掠邑境祖母老不能行父于陞以爲憂實乃負祖母避之俄而父遇賊實奮不顧身與賊

戰死之

崔琮臨潁人性篤孝明季從父官於閩之建陽父卒琮抱屍痛哭而絕

韓檠長葛人父卒時方二歲稍長痛母苦節事之甚謹生養死塋皆如禮

夏廷美長葛人事親孝曾割股療母之病

羅山長葛人母病親嘗母糞病忽愈人謂至孝所感壽登九十九

王思孝長葛人早孤事母甚孝母死廬墓三年

智國韓天錫俱長葛人有孝行巡按訪其實各給粟帛以表其孝

韓發已長邑拔貢事孀慈備極孝養母死晝夜號泣淚盡繼之以血凡二十七日竟卒於母喪之側路乘殷食餼上庠以孝聞流寇犯葛過其門號於衆曰此孝子家也不可入有姊孀居撫所自出全姊之節庚辰大饑宗族有不舉火者殷曰誰非祖父之遺萬一莫保我何以謝先人悉均所有胥免於難

路國士長葛生員事繼母以孝聞析產以田宅美者讓兩弟兄亡撫姪如親生後以恩拔考授濰縣丞享壽七十有一無疾端坐而逝

田姓鄆城業絨線者事母孝母瞽哀號禱祝晨昏以舌舐母目逾年母目復明

張九德李中士楊青俱鄆民割股以療父之病者邑令憐其愚孝而獎之

馮露襄城進士歷縣令科道政聲洋溢任楚省左參時聞母病馳歸晝夜侍湯藥便溺親扶持相聚

二十日而母故哀毀苦次人稱孝焉時撫臣以不
候題參及聞訃悔之疏嘉其孝

李復新襄城人崇禎末年土寇賈成倫劫其家執
其父際春殺之時復新出糴於鄆回家痛哭上告
因赦擬徒解上復新伺成倫於道手刃之自報官
曰父仇雪願就死縣令嘉其孝釋勿論

趙時雍襄城人趙戕子也父子俱被賊執賊殺戕
時雍奪刀殺數賊隨爲羣賊所斃

無名氏襄城人崇禎十三年大飢人相食城南門

外有買活人食者一男子挾其父至橋上自賣諸人曰父生我一場不能養自必亦不得活不如貨錢數十文充父一飯買者立欲引去男子笑曰我既自賣是不怕死者何忙遂別父去有一二義人見其狀急歸取錢以贖而已不及矣闔縣傳聞爲之泣下惜失其名

燕茂字世昌成化時人天性醇謹恪守禮範舉鄉飲外未嘗一至城市父歿廬墓三年事母甚謹每食必跪進母或不怡跪膝下候母怡乃起茂年七

十有七偶病囑其子曰我如不起以老母累汝尙
勉旃疾篤又泣囑其子曰吾未獲終親養日不瞑
矣言訖卒知縣事張芹表其墓爲之銘曰我瞻四
方濟濟其民孝子之行世罕其倫高風千古播於
潁濱西陵片石草木皆春

史奇嘉靖時人初生父以子多家貧棄之其孀母
劉抱回鞠養至九齡劉失所天遂子奇教之成立
孀母卒結廬墓側每日以一抔土培其墓三年遂
成大塚事聞於上覈實旌表並獎以詩中有句云

恩報孀母克全孝至今老眼尙啼痕嘉靖九年廬陵晴川劉魁爲之傳贊按察使鈞陽徐承立石

王根字天培隆慶時人貌朴性淳持身以禮與兄葉異居已久會葉以戶役赴京師時武定侯權威熾甚襄城某僞爲文券以債負千金懇葉於侯嚴錮逼迫業產傾不能脫根痛兄制於勢豪出已資千金代償葉始得釋歸無以自給根分之居食衣物焉友于之誼至今稱述不衰

國朝張朝詢母周氏病篤延醫不效朝詢年十八割

左股烹進母病立愈

李崇輝小召鄉民幼失恃隨母度日家貧拾柴易米以養其母母病崇輝嘗糞哭告於天願以身代及母歿廬墓三年雍正十二年奉 詔建坊入祠魏萬侯郡庠增廣生性至孝父病日夜侍榻前不解衣嘗藥嘗糞及歿哀毀骨立結廬墓旁朝夕哭奠三年如一日胞兄萬祿卽世事嫂如母訓姪成立有司廉其實請 旌

曩純孝原名基盛幼有孝行其父更名曰純孝所

謂知子莫若父名稱其實者歟乾隆三年旌

郭存臨潁人母病割股以進病遂愈知縣郭孝給匾表其門

李文國襄城人至性純孝其母患目失明已久醫治不效日夜哀號焚香祈禱願以己目代免而刻指取血用點母睛兩目復明人以爲至孝格天云劉宗洙弟恩廣襄邑諸生漢臣子也漢臣遭疾宗洙取糞竊嘗鄰婦從壁隙見之其事遂傳及父歿兄弟破產營塋合爨養母者數十年母卒廬於墓

所毀瘠骨立歲餘兄弟以痛母相繼嘔血而卒各
憲以雙孝表其閭里人私謚其兄弟曰孝友曰純
孝云

雪映嵩襄城生員居喪水漿不入口者三日平居
絕葷酒廬於墓側者三年日荷土三擔壘親墓三
年如一日焉

蔣琨襄城歲貢生嗜古博學年十九時其父令範
被害於土賊袁騾子其母亦亡琨赤身操刃率僕
人入賊巢執袁賊手剖其心肝以祭乃父賊首欲

加害瑄曰仇雪死亦甘心賊首釋之

常吉士襄邑歲貢生性孝能養親志篤學慎行其父病便閉乃口吹溲溺沉疴頓痊後父母以壽終廬墓三載孺慕終身雍正十三年建坊旌表耿易襄城舉人博學能文性至孝年十歲喪母事繼母如所生相依五十餘年未嘗有遽色其異母弟少亡遺孤二歲視如己子又一姪甫生數日而姪之母亡命其妻乳養俱成立與兄弟子姪同居共爨終其身未嘗有私析之心其孝友如此

耿瑾襄城廩生孝友性成父病篤欲食西瓜後終身四十餘年不忍食瓜焉弟珖相與友愛體恤無間瑾耄而好學節操凜然行坐一室間手不釋卷陶然自得以及年八十餘素行醇謹乾隆元年奉

恩詔給八品頂帶

王克勲襄城廩生早孤事母張氏孝謹出入必稟明母瞽侍養左右怡然無忤色中夜數起視二十一年如一日後以序當充明經選因母疾不能步履起居必躬負乃固辭不就曰吾依母爲性命也邑

令張以萊綵黥思表其門妻孫氏佐夫事姑克盡婦道並表其門曰乳姑遺範

胡希準胡希聖鄆民胡萬隆之子隆患癰症準兄弟醫治不痊晝夜奉事未嘗刻離雖兒孫不令代也隆復患癰準以口吮之觸父痛楚因自抉一齒隆再病痢垂危聖竊嘗其糞謂準曰父糞苦無憂也父子兄弟咸享壽人以爲孝德所致

許士純鄆民母卒純以哀痛過甚患癰成殘疾失愛於父父溺愛少子純體父志孝友彌篤家貧父

命別居惟依其次子令純日出百錢供養竭力如命歷數十載無難色父病卧數年不起純晝夜侍湯藥不以殘疾少怠終能得父歡心及父卒盡哀盡禮歷三年未嘗入私室有司給匾以表之

胡維烈鄆庠生父患癱症母亦胃疾時發烈請名醫勤於調治藥必親嘗衣不解帶數月不入私室婦翁氏體夫意竭力孝養割股以愈母病雅大中丞給賦性純篤匾表其門

胡作衡字明泉長葛生員事父母以孝聞父先逝

奉母惟謹壽八十而終母死痛哭以亡鄉人哀之
李應運字方旭起仲子長邑歲薦因母病朝夕侍
側湯藥必親嘗事繼母亦以孝聞弟應賓死難遺
孤世篤當流離之際襁負不離迨脫於難教養婚
娶罔不周悉

郭惠迪字禹謨長邑庠生天性孝友七歲喪父痛
母氏孀居竭力奉事當寇難流離未嘗少違母意
與弟同居七十餘年友愛無間白首承顏老而彌
篤有司表其門曰孝友齊芳

程海龍字潛淵長葛人髫年有成孝友天性以醫術擅名辰沅間時經喪亂念父母兄弟尙寄淺土道路梗塞每呼天號泣遇鄉人則悲慟幾絕時寇難未靖不憚艱辛時出機智歷險阻風波中攜家歸里僕婢無失人以爲誠孝所感卽竭力塋墓躬負土石并及伯叔昆季復廬墓一年有叔母唐氏無子奉養喪葬如母撫諸姪如子有子名曰鵬字雲客邑庠生夙有才名工詩名翰墨父歿時尙幼家貧能繼父志從兄良弼良允俱年老無子鵬瞻

養終身從嫂劉氏早寡守志田產付鵬經理及兄子成立皆如數交還毫不爲私族兄良明父子相繼死姑媳二孤鵬身任周卹邑人皆稱父子孝友相繼云

王自貴葛西南鄉民族世單寒孝友出自天性明末寇亂父子被執賊令父子同在軍者必殺貴諱之伺隙曳父逃歸時地皆荒蕪又無耕具掘土播種以養父母母先亡事繼母尤謹承顏順志安其母以悅其父繼母生弟賢父亡時尙在襁褓事母

撫弟倍篤於初弟之教訓婚娶尤極周恤

王慎字舍之長葛人任內鄉教諭天性孝友誼行
端方明庚辰大疫患者多不得生時二親遭之貧
不能延醫呼天號泣祝以身代並愈繼值城陷賊
令凡逃而復獲者死不赦慎不顧逃出尋見父母
身竄荆棘體無完膚負之而逃外寇甫去土賊蜂
起慮親老不能遠遷隱於幽僻處拮据奉養雖危
難之時間視定省不少廢弛不出境者多爲賊害
獨慎舉家獲全皆以爲純孝所感居喪哀毀抱病

積年尤於親族備極周恤他如焚券施惠分囊贈友不能悉載

張希堯字景唐長葛人資性英敏幼喪母賴祖母尙氏鞠育家貧學業未成父則名貿易於外久不歸時年十五奉祖母命孤身尋父遇寇被獲泣告以情言多愷切寇亦感動并奇其幼而知孝釋之二載與父同歸鄉黨義之

程恕字一可長邑庠生力田讀書遠近鄉評悉稱端士父卒哀毀形銷竭心營塋仍結廬守墓朝夕

哭奠三年如一日鄉民憐其孝立碑道旁

孫昕字雲亭郡庠生六歲失恃父紹楚日授毛詩
至鞠育等句爲講解大義輒哀泣父病痢昕延醫
酌方外用鮮白花菜煎湯服時隆冬積雪尋至大
佛寺得二三莖服之愈父又患癰病篤昕夜呼天
泣禱願減己年以延父壽父歿廬墓三年其他濟
貧病賻喪葬掩尸骸成橋路善事不可枚舉撫憲
題獎孝義下禮部議曰孝思純篤義行昭垂給坊

旌表崇祀忠義祠

李鎮鎬字紹武監生素以孝著居母喪廬墓朝夕
哭奠三年不歸家有烏雀巢窻蛇鼠戲砌之異

王琪字潤東素孝謹一日赴墓拜掃回望其家火
起急奔歸聞母猶在室冒火突入抱出琪髮膚無
少傷人謂至誠感神也信

尙家修字潛夫增生其父乘馬過橋失足溺卽投
水抱父沉浮里許獲救得全母氏計病危仰天泣
禱願以身代旬日愈

魏秉正庠生性純孝家貧其母嗜魚每食必具值

隆冬寒沍覓漁人不得臨池鑿冰冰頓開連釣雙
鯉人謂今之王祥云

盧致中庠生孀母卧病數年親侍湯藥朝夕無間
母歿哀毀成疾友愛兩弟仲庠生致和季致道並
以孝友聞州牧何以性篤天倫表其門

杜養德增生成童失怙事孀母孝值流寇亂兄爲
賊擄德與嫂氏抱姪避難姪生甫三月侶伴惡其
啼逼棄之德匍匐哀泣乞存孤衆因感動後亂平
恩勤課姪成知名士

盧思恭字子莊事親至孝義行多端恭歿一時名
流多歌其孝義助執紼焉解元楊如燿有句云君
家舊在湫水旁君名還共湫水長水源之思思不
匱水流之益益無方

杜調元庠生事孀母敬養兼至母病每月朔望嚙
指滴血書懇減已年以增母壽焚祈於神如是者
廿餘年其母果壽登九十

樊聚與其妹皆以孝稱父病篤聚虔誠祈禱願持
清齋三年父遂愈母病篤聚妹潛割股食之母亦

愈

王伯俊庠生母歿號痛幾絕侍養父疾夜不就枕
席者七月友愛三弟始終無間里人於其卒也公
書孝友以贈

蔡瑄幼失怙長讀且耕衣食裁足孝事孀母竭情
盡力母病躬侍湯藥數年人罕有見其面者居喪
哀毀骨立鄉人公舉請旌固辭不受

尙在子字際壬少孤善事孀母有弟三人拙於謀
生時時賙之值歲大歉按日給食弟家胥賴以全

鄉里言孝友者歸焉

顏文聚與弟文英文燦少貧甚父令燦義爲人後
以生閱廿餘年聚偕英貨殖充裕而燦已授室有
子莫給養殮聚計取燦攜妻子歸財產共之一堂
無間

劉席珍庠生事繼母以孝聞仲弟廷珍承祀別房
分厚產與之無吝色其篤於親類如此

王本琳早喪父四弟俱幼家貧母憂慮成噎疾亟
琳默禱於神割臂祈增母壽母驟能飲食孝養二

載乃終

王二全乾隆五十一年歲荒奉母就食湖北房縣
後房縣亂母八十餘歲晝夜號泣思歸時羣賊四
出二全負母持炒米斗餘間道馳奔日行僅三十
里一日至山中遇雨窘甚會東藩董帥兵至二全
驚避董見詢之曰此孝子也給令箭使出境數月
始達鄉里母卒負土成墳

宋符元天性篤孝乾隆五十一年大飢家無升合
養親賣其女得錢兩千往蕭營糴米五斗負之歸

疾行十餘里雷電交作黑夜無懼亦不覺其苦恍
惚間似有神助

耿奇標襄城監生割股療伯父病嘗助賑焚券

耿芸襄城人繼母閭患疽甚芸爲吮其瘰母遂愈

閆文錦幼失怙恃依兄成人長事兄若嚴父兄歿

遺一孤姪文錦愛過其子子有誣稱爲伯父承繼

求多分業者文錦念兄恩痛責其子力辨其誣孤

姪得以安業子亦悔悟率教

史建苗嘉慶癸酉歲飢苗念老母穉子勢難兩全

與妻竇氏議舍子養母遂委子於塗母因不餓於
供

馬三羣馮克新拾養子也家無田產傭力養其恩
父母每還家必買食物以進或戲之日爾事義父
母不思生父母乎羣飲泣不能應嘉慶癸酉歲飢
無雇工者羣行乞孝養恩父母賴以得生

魏進一門孝友七世同居

盧瑛字渭玉庠生事親至孝教子有方家庭聚順
五世同堂

李逢戌耆民惇行孝友五世同堂

姚希聖孝友傳家七世同堂

張遇定同胞七人孝友共勵五世不異爨

張浩然兄弟六人共敦孝友五世同居

孫廷幹廩生博古嗜學居家孝友善事繼母色養
備至尤人所難

楊蘖字谿堂庠生性至孝服勤就養能盡其歡督
學使以善承親志獎之

宋嶧暨弟崑每冬設煖榻大被同寢處終身無纖

芥嫌友愛之風里鄰式化

李當初貧後漸饒裕與弟芳分居已久芳歿遺婦與一子一女貧無依當收養之閱數歲子又亡遺一孤當善育之以承弟祀當年逾六旬無子歿未幾妾生一遺腹子人咸謂友于之報

郭櫚字雲亭生員景潏次子潏病劇囑櫚與長子綸曰吾虧某某債計五百餘千貧不能償汝曹後當竭力補吾過勿作負義人櫚泣受之潏卒兄弟異爨櫚痛念父命獨任其事十數年間諸債悉清

母病夙夜侍養不入私室者數月後兄沒姪男姪女婚嫁視已子女皆加厚焉

姚洪經壯年失恃勸父續絃教妻順母左右就養委曲承歡家雖貧力供甘脆雅大中丞給匾曰善體親心

程明欽生三歲承繼胞伯及成童力勸伯父娶妾生子明倫欽愛之伯父卒倫思異爨欽舉田產肥美者讓焉其後倫家漸替嘉慶癸酉歲飢田產賣盡欽爲贖之使復其所

馮雲驤字天衢增生教讀於外一日語其徒曰宵夢臂痛吾兄其不適乎急歸視果疾非誠心則友何以相憾之速如此

郭步賢性孝友迎養叔母於家若母堂弟步月幼孤多疾待之如同胞共炊爨五十餘年人多不知爲堂兄弟也

范祥光武生嫡母早逝七歲喪父卽撫床號泣抱其父不釋手見者無不流涕事生母能深愛與弟析居沃產悉推讓之又精岐黃術遇人延請雖風

雨未嘗推阻所救濟甚衆

王廷槐監生性友愛兄弟析居所分僅百餘金以
弟廷翰年少盡讓之後家小豐有子五人孫九人
曾孫十四人四世同堂一門雍肅年登八十有六

曾孫十四人四世同堂一門聚徵年登八十祿六
與其師子少盡類也終末小豎休也理人將其人
王政終通坐地大變只不祿其親食終孫前金以
而夫曾孫四代其後其族

